

# Hämmerle e Hassler derschan il latg en differentas Brentas

Dus bio-purs grischuns e duas opiniuns en la debatta da latg

DA CLAUDIA CADRUVI / ANR

■ **Damaun cumenza la sessiun extraordinaria davart il pretsch da latg e l'agricultura. Il latg è da surlaschar a la fiera libra, di cusseglier naziunal Andrea Hämmerle. I dovra ina regulaziun per il latg, di cusseglier naziunal Hansjörg Hassler.** Savens van els perina pertutgant il puesser, ils dus bio-purs e politichers grischuns. Ma questa giada na chargian els il fain betg sin il medem ladritsch – u duess ins forsa dir, els na derschan il latg betg en la medema Brenta? Damaun, a la sessiun extraordinaria che ha lieu cunzunt pervi da la problematica da latg, vegnan ils dus cussegliers naziunals a batter per autras finamiras. *Hämmerle* (ps) è grosso modo cuntent cun la politica agrara dal cussegl federal e na vul betg ch'il stadi sa maschaidia en la fiera da latg. *Hassler* (pbd) tema ch'il pretsch da latg crodia anc pli fetg e pledda perquai per ina reglamentaziun.

## In bun exempel - Cotti da Sur

I vegn mulschì memia bler, explitgescha Hämmerle il problem actual cun il pretsch da latg. Ma quai na saja nagina raschun ch'il stadi stuess intervegnir. «Sch'in scrinari producescha memia bleras sutgas, che nagin vul cumprar, lura na po il stadi era betg gidar», di Hämmerle. «Jau chatt endretg la politica agrara ch'ins fa da preschent. Ins surlascha ils pretschs da product e la vendita a la fiera.» L'ultim pass ch'ins haja fatg en questa direcziun saja la dismessa dals contingents da latg.

Las ulteriuras prestaziuns ch'ils purs porschian, sco per exempel la tgira da la cuntrada, vegnian rembursadas cun pajaments directs. Sin quest sector possia



Il cussegl naziunal ha da decider davart 44 intervenziuns ord il sector agrar. I na va betg mo per il pretsch da latg.

KEYSTONE

il stadi bain intervegnir e pretender dapli prestaziuns ecologicas, ma sustegniments dal martgà, sco per exempel subvenziuns da 20 milliuns francs per la pulvra da latg, na portian nagut.

Era cun l'avertura da la fiera, che cussegliera federala *Doris Leuthard* less cuntanscher, va Hämmerle d'accord. Ils purs stoppian emprender da viver cun l'exteriur. Quai na giaja sa chapescha betg cun produenziun da massa, mabain mo cun dapli ecologia e spezialitads. In

bun exempel saja il pur *Alfons Cotti* da Sur che fetschia chaschiel-nursa ed haja success cun spezialitads ecologicas.

Ina sessiun extraordinaria na portia per regla betg bler, di Hämmerle. Sulet ch'il parlament possia svidar in pau il puppen.

## L'avertura è mo buna per Monsanto

Tut auter tuna quai tar Hassler: «I dovra la debatta, pertge i dat problems en l'agricultura che ston vegnir discutads.»

Suenter la dismessa dals contingents da latg na saja la fiera betg sa sviluppada bain. Era Hassler di ch'i saja vegnì mulschì memia bler il davos temp e che la fiera na saja betg pli equilibrada, ma el tira autras consequenzas. La bransch da latg (tudestg: Branchenorganisation Milch BOM) haja chattà l'emna passada ina schliaziun per regular il quantum da latg. Uss stoppia il cussegl federal declerar questa schliaziun sco «lianta per tuts», di Hassler. Quai saja pussai

vel sin fundament da la lescha agrara. Sch'il cussegl federal decleria la schliaziun sco lianta, stoppian tuts sa tegnair vidlonder, era quels che na fetschian betg part da l'organisaziun da la bransch da latg.

I na sa tractia betg d'ina nova contingentaziun statale, mabain d'ina regulaziun sco instrument da la fiera libra, explitgescha Hassler. Sumegliantas regulaziuns dettia quai era per ils purs da vin.

La sessiun extraordinaria saja era impurtanta per discurre cun cussegliera federala *Doris Leuthard* ch'è fin uss sa fatga ferma per la fiera libra. «Nus purs lain accentuar che quai è in grond privel per nossas structuradas e noss manaschis da famiglia», di Hassler. In pur svizzer na possia betg concurrer cun la produenziun da legum ord la Spagna, nua ch'ins engaschia lavurers da l'Africa dal nord. E la charn svizra vegnia adina ad esser pli chara che la charn da Brasilia u da l'Argentina, nua che la biestga possia pascular sur onn en il liber e na dovria ni stallas ni uigls. I dovria fieras regionalas survesaivlas, di Hassler. In'avertura da las fieras agraras gidass mo a concerns agraras sco Monsanto e Syngenta.

## 44 intervenziuns da tuttas sorts

A la sessiun extraordinaria vegnan blers oratur a profitar da la chaschun da discurre. Suenter la discussiun datti ina cascada da votaziuns. Il cussegl naziunal ha da decider davart 44 intervenziuns ord il sector agrar. I na va betg mo per il pretsch da latg, mabain era per la mal-sogna da la lieunga blava, contribuziuns d'alpeggiament, contribuziuns per terren spundiv, la castraziun da purschels u la protecciun dad avieus.